

東
華
續
錄

東華續錄

道光四十七

臣王先謙敬編

臣周瀚蕃恭校

道光二十三年癸卯春正月庚戌諭前據敬徽等奏改河有礙運道惟有堵築漫口挽歸故道爲守經不易之法當經降旨准行嗣據御史雷以誠奏南河漫口無庸堵築請改舊爲支以通運道復令潘錫恩抵任後再行查勘茲據奏稱灌口非可行河之地北岸無可改河之理不敢輕議更張並查明歷屆改河不成各案請仍堵築決口漕船出重回空仍由中河灌塘等語所奏甚屬詳明著卽照議辦理毋稍延誤○丙辰改浙江定海縣知縣爲定海廳直隸同知○浙江巡撫劉韻珂奏已革石浦同知舒恭受前署定海縣知縣當縣城失守之際實已捐軀後因被救得甦出於意外委

非捏飾請格外加恩得旨諒汝所奏亦不敢虛假然因此獲罪者甚眾朕賞功罰罪豈能辦理兩歧卽如革職定罪之將軍參贊等數年來豈皆無片善可錄耶止緣國法具在朕亦無可如何耳由來盡節捐軀之大小文武俱按定例子以卹典從無論及平素居官若何若失地偷生之輩其治罪與否視其平素居官之賢否以爲準則有是理乎能服天下乎余步雲無軍功乎朕亦無可奈何汝止論一面之詞爲一人之謀冒昧曉曉獨不思朕之難以處之也再尙有一言朕欲問汝該革員旣以死自誓曷不同三鎮一併捐軀至今尙覲然於世耶○丁巳諭廓爾喀額爾德尼王熱尊達爾畢噶爾瑪薩野朕臨御天下柔遠能邇寰海共樂昇平王自襲爾父爵以來恪守藩封敬順將軍一切事宜均照駐藏大臣指示遵行甚屬可嘉茲遣使噶箕咱噶達巴孟邦哲等恭請朕安呈進

表貢朕嘉悅覽之當令來使噶箕咱噶達巴孟邦哲等觀見筵宴
數次使觀諸藝至王所進表文內添敘爾國被披楞欺陵叩求賞
派天兵救助並賞賜銀兩地方及易換地方等情天朝統馭萬方
一視同仁爾王惟有愛惜百姓把守邊界不可輕舉妄動自無他
虞且各部落各守土地百姓日久相安從無借兵借餉賞賜地方
及易換地方之事道光十八年間曾因爾國王求賞銀兩特降敕
書明白曉諭爾國王自己領悉此時不當輕信虛誕之言再有所
請天朝優待外藩恩禮備至爾國王效順有年久通朝貢自必深
明大義恪守藩封斷不可爲浮言所惑也今噶箕咱噶達巴孟邦
哲等回旋將頒給詔諭賞爾段正物件交伊等齎往至時祇領嗣
後深感朕恩遵駐藏大臣指示永盡恭順之道力效肫誠之心凡
爾屬下善爲管理以期各享安樂永受朕恩欽哉勿怠特諭○乙

丑諭激揚大典三載一行滿漢臣工有能持正秉公竭力盡心克稱職守者自當甄敘精力漸衰不勝其任者亦難姑容茲乃京察之年該部將內外諸臣開單題請朕詳加覈定大學士穆彰阿潘世恩戶部尙書祁雋藻工部尙書賽尚阿戶部侍郎何汝霖夙夜在公勤勞備至直隸總督訥爾經額去歲辦理一切殫心盡力諸臻妥善俱著交部議敘左副都御史隆勛內閣學士姚元之精力漸衰俱著原品休致餘著照常供職○已已諭圖明額等奏探明布噶爾與霍罕起釁用兵爭奪地方緣由一摺據奏布噶爾伯克與霍罕用兵既已併吞霍罕地方嗣被希爾阿里奪回數處等語卡外遠夷蠻觸相爭自當置之不問惟邊防卡倫必應加意防範著該大臣等嚴飭各卡弁兵遇有進卡外夷認真稽查並隨時偵探情形嚴密防守毋得稍有疏虞○達洪阿姚瑩奏前年八月洋

船在臺灣洋面遊奕是時並無風暴該洋人駛進口門對二沙灣礮臺連發兩礮打壞兵房我兵隨後放礮回擊九月又有三桅洋船至雞籠洋面攻破我礮臺石壁燒我哨船上年正月生擒顛林等眾起獲礮械號衣旗幟及印文等件均係浙江各營之物實非遭風商船命怡良詳細查訪又奏彰化縣匪徒陳勇等分股聚眾謀逆督飭文武兵勇勦辦將首要各犯並獲勦辦完竣又草烏匪船圖引洋船來臺滋擾乘機出洋行劫亦經督飭員弁義首屢次殲擒匪徒懲辦命怡良確切查明如無冒濫督同該鎮道將在事出力之文武員弁兵勇義首等酌量保奏不准稍有遷就○是月展賑江蘇蕭縣桃源二縣災並給沭陽等六縣衛口糧貸湖北江陵等三縣衛湖南澧州洞庭二營水災籽種口糧展緩直隸安州等十九州縣雹災水旱災通賦山東臨清等十六州縣衛風災蟲

災水旱災正雜額賦江蘇崇明場鹽課緩徵江蘇高郵等二十九
州縣衛災歉通賦

二月己卯 上御經筵○以李品芳爲內閣學士兼禮部侍郎銜

前任內閣學士倭什訥爲左副都御史候補三品京堂○庚辰移熊岳副都統協

領駐金州金州城守尉駐蓋州蓋州防守尉駐熊岳統歸金州副

都統兼轄改岫巖歸盛京將軍轄○丁亥以巴雅爾綽克托爲內

閣學士兼禮部侍郎銜由散秩大臣遷○實授李湘棻太常寺少卿仍署

漕運總督○乙未欽差大臣廣州將軍伊里布卒贈太子太保○

丙申以李煌爲禮部右侍郎由內閣學士遷○是月貸湖北荊州被水駐

防倉穀

三月戊申以季芝昌爲內閣學士兼禮部侍郎銜服闋內閣學士○庚戌

以耆英爲欽差大臣赴廣東辦理通商事宜璧昌署兩江總督由

州府

○癸丑諭本日大考翰詹經監試王大臣查出右贊善如山

懷挾賦本如山著卽革職交刑部照例治罪○丁巳 御試翰林

詹事等官擢萬青藜五員爲一等餘升黜留館有差○庚申改裁

西安鎮總兵移置天津爲通永鎮總兵其西安鎮兵一千六百餘

名撥歸撫標一千二百名添設中營原設左營參將改爲撫標中

軍參將右營遊擊改爲左營遊擊應設右營遊擊卽以鎮標左營

遊擊改撥其鎮標餘兵四百餘名准其歸併西安城守營原設城

守參將改爲副將移神木協副將並中軍都司歸西安城守營移

西安城守參將歸神木營西安鎮原設官弁一併裁抵通永鎮添

設各缺○乙丑賞琦善三品頂帶爲熱河都統○丙寅賞文蔚藍

翎侍衛爲古城領隊大臣奕經四等侍衛爲葉爾羌幫辦大臣○

丁卯怡良奏渡臺後沿途訪察兩次洋船之破一因遭風擊碎一

因遭風沈閣並無與之接仗及計誘等事達洪阿姚瑩一意鋪張致爲洋人藉口殊屬孤恩溺職請從重治罪命革職解交刑部會同軍機大臣審訊尋奏上得旨達洪阿姚瑩加恩免其治罪○王廷蘭以病免調葉名琛爲江甯布政使以萬貢珍爲湖南布政使管邇羣爲安徽按察使六品頂帶已革布政使○已已諭戶部銀庫設有管庫司員專司出納管庫大臣總領其事復疊次派出王大臣盤查近又添設查庫滿漢御史各該員等果能認真經理覈實稽查何至羣相蒙混釀成巨案本年因庫丁張誠保偷盜庫銀破案特派大臣將新舊各項逐一盤查本日據惟勤等覆奏新收常捐等款均與應存之數相符舊存正項飯銀竟虧空銀至九百二十五萬二千餘兩之多實屬從來未有之事覽奏曷勝忿恨以國家正項錢糧膽敢通同作弊任意攫取似此喪心昧良竟同僧國盜賊本

應立置重典以肅法紀惟事閱多年冒非一任卽書吏丁役等亦
人數眾多偏不確切查明恐至遺漏倖逃法網其自嘉慶五年以
後歷任管庫及歷次派出查庫王大臣皆係親信大員亦復相率
因循毫無覺察並無一人能發其奸甚負委任不知諸王大臣有
愧於心否朕自咎無知人之明抱愧良深均著交部查取職名嚴
加議處此案著派載銓穆彰阿敬徵裕誠賽尙阿聚寶查辦所有
歷任管庫司員查庫御史並丁書人等著逐細查明從嚴治罪其
見在虧短庫銀應如何分別罰賠及設法彌補之處卽著悉心妥
議具奏又諭見在戶部銀庫查有虧短歷任稽查銀庫御史不復
糾察弊端直同虛設除聽候欽派王大臣查明懲辦外所有稽查
三庫滿漢御史均著悉行裁撤○以吳振械爲貴州按察使

由糧道遷

○庚午諭近據戶部徹底查明銀庫虧欠銀兩至九百二十五萬

二千餘兩之多殊堪駭異甚屬可恨特派大學士王大臣等詳議嚴行罰賠從重辦理其八旗滿洲蒙古漢軍人等均係世受國恩世僕此等異事聞之自必切齒痛恨試思許多虧項儻不行彌補各項如何辦理前者朕卽恐用項不敷故於各項需用俱行節儉無稍奢費今復出此遠年積弊不可不將一切實力撙節見在已令將各項分外撙節爾兵丁等須體朕之節儉於一切生計儉益加儉但恐支放兵丁等月領餉銀庫平兩數致有不足俟庫項稍裕之時必須照常支放斷不忍將朕兵丁子弟偏刻也爾等務體朕意妥爲演習技藝悉成勁旅將此令八旗滿洲蒙古漢軍都統前鋒統領護軍統領等各諭令兵丁知之○諭軍機大臣等見在銀庫虧空至九百餘萬之多各衙門一切用款本多冗費若仍照舊領放恐致支絀著諭知宗人府戶部工部內務府三院三山太

常寺步軍統領衙門順天府各堂官體察情形所有大小工程及支領款項遇有可裁減者卽行裁減可節儉者卽行節儉總期實力撙節積少成多庶於公項有裨○辛未以湯殿邦爲禮部右侍郎

由內閣學士遷

○壬申治浙江餘姚潰散文武員弁罪○癸酉諭前因

戶部銀庫查出虧短爲數甚鉅當有旨派王大臣查辦茲據查明歷任銀庫司員查庫御史各職名開單呈覽該員等或司收發或掌稽查喪心昧良釀成巨案實出情理之外自應嚴加懲治以肅法紀所有單開各員著交吏部查明見有官職及因事故回旗回籍人員均著先行革職並將已故各員之子孫有無出仕及見任何官詳悉確查開單具奏一併交載銓穆彭阿敬徵裕誠賽尙阿從嚴查辦○是月貸山西絳州等六州縣湖北荊州駐防被災倉穀江南駐防暨督協各營災歉兵丁銀湖南鳳凰等五廳縣苗佃

屯丁籽種口糧

夏四月甲戌朔以溫子巽爲江西按察使

由河南糧道遷

○以惟勤爲烏

魯木齊都統調舒興阿爲兵部右侍郎倭什訥爲盛京兵部侍郎

以廣福爲盛京刑部侍郎

由內閣學士遷

○以徐繼畬爲福建布政使

由廣東按察使遷

○調陸費瑋爲甘肅布政使以陸建瀛爲直隸布政使

由廣東按察使遷

察使

○丙子實授麟魁禮部尙書轉善燾爲吏部左侍郎調柏葰

爲吏部右侍郎特登額爲刑部左侍郎

由工部郎中

○以陸蔭奎爲直隸

按察使

由長蘆鹽運使遷

○調黃恩彤爲廣東按察使以趙德潯爲江蘇

按察使

由雲南池西道遷

○丁丑諭本日據御史陳慶鏞奏琦善等三人

起用爲刑賞失措無以服民等語前因琦善奕經文蔚先後辦理

夷務未能奏效當將琦善等革職治罪因思從前辦理不善總由

朕無知人之明以致琦善奕經文蔚諸人喪師失律迄無成功朕

惟有返躬自責愧悔交深何肯諉罪臣工以自寬解琦善等韜略未嫻限於才力見在年力正強是以棄瑕錄用予以自新今據該御史剴切指陳請收成命覽其所奏亢直敢言朕非飾非文過之君用人行政一秉至公初無成見豈肯因業有成命不便收還自存回護耶琦善奕經文蔚均著革職卽令閉門思過以昭賞罰之平至黜陟之權操之自上本非臣下所能干儻該御史所奏於情法未能持平朕亦不能曲從以邀譽中外臣民應曉然於朕撫躬引咎虛懷納諫之至意也○奎照以病免以特登額爲左都御史轉成剛爲刑部左侍郎調惠豐爲刑部右侍郎由盛京刑部侍郎調○以薩迎阿爲熱河都統調善燾爲戶部右侍郎轉柏葰爲吏部左侍郎以文慶爲吏部右侍郎由庫倫辦○調明訓爲戶部侍郎以春佑爲盛京禮部侍郎由內閣學士遷○庚辰諭載銓等奏酌擬管庫司員查

庫御史罰賠銀數並管庫查庫王大臣管理盤查年分分別開單呈覽管庫司員查庫御史均有收發稽查之責乃喪心昧良釀成巨案著自嘉慶五年起至道光二十三年歷任庫官查庫御史各按在任年月每月罰賠銀一千二百兩已故者照數減半其因此案先行降革之榮慶等六員並甫經卸任之薩霖宋林曙均加一倍罰賠其歷任管庫查庫之王大臣亦應覈其年月亮數分別罰賠所有嘉慶五年以後管庫王大臣著每月罰賠銀五百兩查庫王大臣每次罰賠銀六千兩已故各員按數減半其應如何酌定期限期及逾限不完作何治罪並庫丁人等應如何究懲之處著載銓穆彰阿敬徵裕誠賽尙阿明定章程具奏此次單開各員內有無遺漏舛錯之處並著再行詳細確查隨時具奏又諭前因戶部銀庫查出虧短當將歷任管庫及查庫之王大臣交部查取職名

嚴加議處茲據查明開單呈覽並請將應議之管庫查庫王大臣等均照溺職例革職庫貯關緊要出納不容絲毫蒙混是以特派管庫大臣總領其事並疊派王大臣前往稽查應如何認真防範實力盤查俾不至稍有弊端方爲不負委任乃見在盤查庫款竟致虧短數百萬之多似此明目張膽通同舞弊該管庫查庫王大臣何至毫無聞見可見平日管理大臣既不實心經理而奉派稽查者亦止視爲具文遂使羣相蒙蔽更無能發其奸實屬孤恩溺職卽照部議悉予褫革亦屬咎所應得姑念人數以多一時備用乏人著從寬均改爲革職留任諸王大臣等務各知愧知感勉贖前愆毋負朕格外矜全至意○癸未諭戶部三庫總司出納事務較繁著派戶部滿漢左侍郎兼管向來管理三庫大臣僅派二員著添派廖鴻荃陳官俊嗣後凡遇收放銀兩日期六人中輪應

一人親往監視並專司啓閉不准稍有曠誤其管庫大臣統俟三年期滿再行奏請更換所有銀庫司員卽責成管庫之大臣兼管之侍郎隨時留心察看如才具中平不能得力卽咨回原衙門當差儻查有執法營私之員著卽嚴參懲辦毋稍姑容該大臣等務當振刷精神力除弊竇儻日久生懈又復視爲具文朕惟有執法從事不能再邀寬典也懍之○乙酉前任左都御史奎照卒予祭葬○丙戌諭載銓等奏籌畫經費一摺並片奏各項酌減章程等語俱著照所議辦理惟馬銀一項每年除出青滅放外約需馬乾銀四十四萬餘兩該王大臣等請暫減一半充補兵餉著八旗都統各營及領馬乾餉銀各衙門詳查妥議具奏至外省情形不同並著戶兵二部分別省分會議章程奏明辦理○以王兆琛爲四川布政使

由甘肅按察使遷

○戊子以楊以增爲甘肅按察使

由兩淮鹽運使遷

○辛卯諭軍機大臣等桂良等奏南甸土目糾匪滋擾一招據奏
騰越廳屬南甸土司之弟刀承緒因搶收田穀斃命脫逃乘間裹
脅野夷焚掠村寨戕害弁兵經提督汪道誠派兵協同勦辦旋據
該鎮道府等稟報各路弁兵勇練攻破賊巢先後拏獲匪犯二十
八名殲斃不計其數復於二月十一日攻破猛咪賊寨生擒七人
殲斃燒斃五十餘人餘賊悉遁見在附近山箐並無賊匪伏匿等
語覽奏均悉該督見已起程前往著卽會同提督商酌機宜趕緊
督拏務須迅速藏事勿留餘孽首犯刀承緒見據探明逃往干崖
土司相近蠻允夷寨著卽懸賞購拏期於必獲毋任稽誅並將起
釁根由確切查明毋稍諱飾龍川江巡檢馬偉堂督練上屋放火
焚燒著查明出力實迹秉公保奏候朕施恩此等匪徒糾脅至千
餘人斷非一朝夕所能猝集該地方文武員弁果能及早覺察立

卽查拏懲究何至釀成事端騰越同知吳均署南甸都司事守備楊濟川於刀承緒等犯罪脫逃不能緝獲究辦又不隨時防範實屬玩忽著先行摘去頂帶勒令率同土司兵練實力擒拏儘日久不能獲犯及查有辦理不善稟報不實之處另行嚴參究辦○乙未諭前據載銓等奏擬將各支款減平兌放原爲撙節經費起見當經降旨准行惟念兵餉一項爲該兵丁等計口授食之需近復疊降諭旨勤加訓練若照該王大臣所議雖減數無多而兵力未免支絀非所以示體恤所有京內京外各旗營及直省額設各兵丁應領錢糧仍著一體照舊支放毋庸酌減以示朕優加矜恤之至意該兵丁等務當力圖自效悉成勁旅用備干城之選朕實有厚望焉○丁酉以周祖培孫瑞珍俱爲內閣學士兼禮部侍郎銜

五月甲辰調葉名琛爲甘肅布政使陸費瑔爲江甯布政使○甲寅諭軍機大臣等富呢揚阿奏官兵捕逐野番情形一摺據奏周悅勝兩次勝仗之後賊已聞風逃匿聚集克克烏蘇擁眾自固擬卽乘其烏合一鼓殲除會商周悅勝分檄徐華清站往邀截夾擊等語覽奏已悉前有旨諭知該督等卡外地險路遙不值窮追深入務使賊番畏懼兵威不敢近邊滋擾卽可酌量撤兵見奏情形自在未奉此旨以前據稱徐華清所帶之兵月底準可接仗其已未得手此時常有確信該督見駐將軍臺行營該處爲通番總路足可聯絡聲勢保護糧運著就見辦情形通盤籌畫仍遵旨務令賊番畏威潛匿不敢復擾邊陲卽行撤兵藏事慎勿輕聽將弁等貪功冒險之言窮追深入以致曠延時日糜餉老師是爲至要○戊午以管通羣爲浙江布政使常大滄爲安徽按察使

○丙寅諭富呢揚阿奏官兵剿捕賊番續獲勝仗一摺賊番竄克
克烏蘇一帶經該督分飭提鎮各路接捕總兵徐華清副將站住
帶領官兵追擊在只黑底俄博地方接仗先後殲斃賊番二百餘
人墮落山澗跌斃者無算餘賊分投奔竄所辦甚好徐華清站住
先行交部從優議敘所有此次出力各員著該督查明酌量保奏
候朕施恩其落澗傷亡之馬兵卹必西著該部照例議卹○戊辰
怡良以病免以劉韻珂爲閩浙總督調吳其濬爲浙江巡撫以陸
費瑒爲湖南巡撫崇恩爲江甯布政使方濤爲山東按察使由陸
運使
○是月緩徵山東德州等十七州縣被水被旱新舊正雜額賦
六月甲戌裁減駐防江甯福州杭州廣州及福建廣東廣西各營
馬匹○乙亥諭軍機大臣等本日據吳其濬由驛馳奏武岡州高
沙市地方痞徒阻米出境糾眾戕官等語湖南署武岡州知州徐

光弼因查拏店徒被戕署州同師鳴鳳亦受重傷見在該撫帶兵馳往督捕永州鎮總兵英俊亦已派兵前往提督長春著察看情形如必須撥兵會剿迅速辦理務將首從各犯設法查拏以伸國法至武岡州界連各屬山徑叢雜附近猺疆難保不此拏彼竄業據該撫飛飭各屬並咨照廣西巡撫飭屬協同兜拏毋令勾結蔓延是爲至要所有匪徒曾如炷等是否卽係正犯其起釁根由是否因該州緝拏阻米出境匪徒一案抑另有別情該州弁兵並未受傷是否觀望不救抑係聞風逃避均著確切查明據實具奏○戊寅諭富呢揚阿奏官兵分剿番賊連獲勝仗河北地方漸就肅清一摺番賊自上次在只黑底俄博地方被官兵擊散後零股餘匪在多澧溝腦加木麻里木等處山坳伏匿抗拒經總兵徐華清等簡帶精兵分路剿捕前後殲斃賊番五百餘人墮崖落水者不

計其數餘匪聞風逃匿該督見駐四棵樹地方相度機宜督飭各提鎮在河北地方接捕以靖邊隅辦理尙屬妥速所有在事出力各員弁著富呢揚阿查明據實保奏候朕施恩涼州鎮標中營經制外委何進寶首先搶上山梁致被賊匪戕害著該部照例賜卹陣亡兵丁一名著一併議卹○己卯毛樹棠以病免調楊殿邦爲倉場侍郎以季芝昌爲禮部右侍郎由內閣學士遷○辛巳增陝西撫標經制外委三額外外委中左營各一右營二○庚寅命敬徵何汝霖赴江南覆勘河工○甲午諭軍機大臣等吳其濬等奏拏獲戕官首要各犯並究出積年賊匪巢穴委員接捕並請將逃回營員革職拏問各一摺湖南武岡州痞棍戕官劫搶罪大惡極吳其濬馳抵該郡卽據署新化縣知縣汪世澤拏解首犯曾如炷並下手戕官之曾以得一犯訊出確供分別監禁斬決此外已經拏獲要

犯楊老六等數十名著委員詳細嚴訊未獲之犯卽飭嚴拏毋令漏網其洪厓洞地方旣爲逋逃淵藪自應派兵守隘以防該匪等竄出擾害惟該處地形險阻莫知路徑雖經派有練勇偵探聞道仍宜加意慎重不可冒險輕進惟當設法徧令出洞分路兜擒勦洗淨盡以弭後患是爲至要至該營弁等觀望不救以致釀成戕官巨案情節尤爲可惡且恐兵弁有交結匪徒臨時故縱情弊必應徹底根究湖南武岡營守備蕭國相把總熊登禮俱著革職交該撫提同已故知州徐光弼家丁差役及各犯質對明確嚴審定擬具奏遊擊蔡發全著解任歸案質訊○乙未添設江南福山鎮水師總兵○丁酉停止長蘆鹽政呈進佛手○戊戌以吳鍾駿爲內閣學士兼禮部侍郎銜由詹事遷○庚子雲南南甸土匪平○辛丑諭吳其濬奏續拏戕官要犯多名及洪厓洞賊匪業已解散飭屬

查拏一摺湖南武岡州痞棍曾如炷等因阻米出境起釁膽敢聚眾戕官實屬罪大惡極業經吳其濬帶兵前往卽將首要各犯拏獲訊明按律治罪並查該處洪厓洞地方藏匿賊匪素爲民害當卽委員偵探分路兜擒以弭後患茲據奏稱該委員等帶領兵勇會同營員前往洪厓洞按捕賊匪槍斃多名又於附近洞口一帶拏獲要犯曾辛酉等七十餘名解州訊供見共獲犯已有百餘名之多地方百姓畏威感服擬卽撤兵等語辦理尙屬迅速所獲各犯除業經正法外其曾如炷一犯係此案渠魁著照議凌遲處死舒惟清一犯著照擬斬決卽行正法所有同謀戕官未獲各犯仍著飭屬嚴拏盡法懲治毋任漏網餘著照所議辦理○是月展緩浙江海甯等十二州縣衛山東陽信縣災歉逋賦

東華續錄

道光四十八

臣王先謙敬編

臣周澍蕃恭校

秋七月乙巳諭慧成奏中河廳九堡隄頂過水奪溜南趨一摺據稱本年六月沁黃盛漲大溜湧注將中牟下汛八堡新埽先後全行墊塌趕卽集料搶補甫鑿出水溜忽下卸至九堡無工之處正值風雨大作鼓溜南擊浪高隄頂數尺人力難施隄身登時過水全溜南趨口門塌寬一百餘丈等語著該河督督飭道廳營汛各員趕緊籌辦盤作裹頭事宜毋得再有懈誤慧成身任河督未能先事豫防著交部嚴加議處鄂順安兼轄河務亦著交部議處疏防之專管中河通判王葵初協備張廣業並防守之中牟下汛縣丞張世惠把總幸得成均著卽行革職兼轄之中牟縣知縣高均

著交部議處開歸道福敏到任僅止半月開封府知府鄒鳴鶴見令專管城工惟均有兼轄之責咎亦難辭著一併交部議處○諭軍機大臣等著英奏酌定通商輪稅章程一摺據奏五月二十六日帶同黃恩彤咸齡輕裝減從即坐火輪船前往香港接見樸鼎查已將通商章程及輪稅事例商定大局於六月初一日回省其粵海關進出貨物見已議定棉花茶葉稅則約計關課有贏無絀即照伊里布前定期限於七月初一日先在廣州開市著即照所議辦理惟香港四面環海舟楫處處可通見已有內地民人零星買賣必須明定章程以杜走私漏稅並一切未定事宜著耆英會同祁墳程裔采文豐通盤籌畫永杜弊端俾各省皆可照辦其米利堅佛蘭西等國請照新定章程辦理准俟定議後另行辦理○命敬徵何汝霖赴東河查勘○緩徵浙江定海廳復業民戶正雜

額賦○丙午命方濤仍以鹽運使候補以陳慶偕爲山東按察使

由內閣侍讀學士遷

○丁未釋鄧廷楨回籍○戊申諭慧成著卽革職暫留

河東河道總督之任鄂順安著加恩改爲革職留任中牟縣知縣高均著革職開歸陳許道福敏到任僅止半月開封府知府鄒鳴鶴見辦城工均著改爲革職留任○癸丑諭各省解交內務府廣儲司六庫銀兩均知照都察院查覈○諭軍機大臣等祁墳等奏籌護礮臺擬行屯田一招據奏虎門等處礮臺見經修復必須重兵防守而兵額未便請添查出虎門附近及沙角一帶多有淤出沙坦可以圍築成田令人承種其餘各臺或後靠石壁或傍依山麓均可酌行屯田之法藉以保護礮臺惟上下兩橫檔並無後路必須大小兵船往來援應等語以本地之田養本地之民卽以種田之民爲禦侮之兵固屬守隘防虞寓兵於農之計見任糧道孔

繼尹既經辦有端緒著卽責成該道一手經理務使事可經久不
至有名無實此次捐辦屯田紳士准按所捐銀數照築臺鑄礮一
律奏請鼓勵另片奏團練鄉兵於粵省情形相宜附省各鄉有昇
平社學公所爲團練總匯之地東路復立東平社學公所陸續舉
行聲勢聯絡等語著該督等體察情形隨時妥辦務期有濟實用
永固邊防○戊午以慶錫齡鑑俱爲內閣學士兼禮部侍郎銜錫
由內閣侍讀學士銓
鑑由太僕寺卿遷斌良博迪蘇俱爲左副都御史斌良由通政
使博迪蘇由
太常寺卿遷○庚申諭訥爾經額奏遵查直隸地方難以興舉屯政水

田一摺據奏天津至山海關一帶戶口殷繁地無遺利其無人開
墾之處乃沿海鹹灘潮水鹹澇不足以資灌溉屯田之法勢難舉
行至全省水利之說歷經試墾水田屢興屢廢總由南北水土異
宜民情多有未便而開源疏泊建閘修塘一切工費皆需重帑未

敢以有用之項輕議試行惟地高慮旱地窪慮潦但在地方官於境內溝洫及時疏通以期有備或開鑿井泉以車戽水亦足裨益田功等語所奏自係實在情形均著照議辦理至南省民間用水車汲井溉田需費不多最爲利便見據該督照式製造發交各府州著卽諄飭各屬廣爲勸導實力奉行如有民間不知此法卽於頒發式樣後勸令按井製車試行灌溉其始未免惜費憚勞如行之有效互相傳造於農功必有裨益用副朕敦本重農之至意○辛酉諭富呢揚阿奏河北近邊肅清並河南番族畏法獻賊酌撤各路官兵一摺青海野番節次偷渡滋擾上年捕逐出卡後多在河北一帶盤踞窺伺經該督奏明會同提督周悅勝派令署總兵徐華清等統帶官兵分路痛剿連獲勝仗賊番勢窮逃散該提督等督率兵弁在賈爾蓋烏蘭水公葛腦爾等處接捕拏獲匿匪多

起河北肅清其竄匿瑪慶雪山之賊經則巴錯洛率眾攻捕又復
竄回適該鎮徐華清等派兵繼至迎前奮擊把總蕭進先楊正才
首先衝入賊隊該賊番腹背受敵當經殺斃五十餘人生擒三人
賊始奔潰復追殺二十餘人餘俱落崖跌斃卽於殲斃各賊內認
出著名賊首青木塔爾父子頭目奴科那囉勒根增四人屍軀奪
獲馬牛羊隻及帳房器械各件其生擒賊番三名逐經訊明搶劫
多次均係積年巨盜卽在軍前梟示以彰國法至河南爲番賊巢
穴經該督派員先往曉諭復懾以兵威各番知威知懼將送回賊
犯十名擒獻並結稱嗣後再有竄歸隨時送出等語此次勦辦野
番布置妥協迅速藏功朕心深爲嘉悅富呢揚阿著加恩賞戴花
翎周悅勝著賞加太子太保銜徐華清著賞加提督銜俱仍交部
從優議敘原派各路官兵見俱已陸續撤回其未撤之西河兩鎮

官兵一千名稽查餘匪俟大兵凱旋後地方實在安靜再行就近歸伍○諭富呢揚阿奏番族打仗出力懇請獎勵一摺德勒克族登則巴錯洛聞大兵勦捕賊番帶兵自效追趕逃匪在丹科地方接仗與官兵兩路夾攻斬獲甚多見在大兵凱撤該番族嚮義可嘉則巴錯洛著加恩賞給千戶職銜卽令管束該處族番捍衛邊境該番族稟請內附情詞懇切著卽照玉舒等族之例准其內附歸隸青海大臣管轄所有應設百戶分轄及歲納馬匹數目各事宜並著富呢揚阿悉心妥議具奏○戊辰直隸東光縣鄭家口汎河溢命訥爾經額堵治之○是月緩徵江蘇武進等七縣歉收新舊額賦

閏七月辛未朔調關聖保爲工部左侍郎轉連貴爲禮部左侍郎

調廣福爲禮部右侍郎以斌良爲盛京刑部侍郎

由左副都御史遷

○壬

申諭軍機大臣等據祁墳等奏候選道潘仕成製造水雷已成見
由該道員派令曾經學習製造並製配火藥之生員李光鈐議敘
八品職銜潘士豪議敘從九品李光業帶同匠役將水雷二十具
火藥四百斤並繕繪水雷圖說一冊齎送進呈等語見在李光鈐
等尙未到京俟齎到後再行試演至該道潘仕成業經疊次加恩
賞戴花翎並加按察使銜應如何再加獎勵之處著祁墳等酌覈
具奏候朕施恩尋奏潘仕成屢次捐貲辦公始終奮勉得旨潘仕
成著賞加布政使銜以示獎勵○癸酉以河南省城積水未消命
於十月舉行鄉試○丙子命鄂順安程桂林采撫恤河南安徽被水
災民○丁丑申諭浙江福建會拏洋匪○戊寅直隸永定河溢○
癸未以廣林爲左副都御史由光祿寺卿遷○甲申諭國家分設八旗兵
丁駐防各省立意至爲深遠嗣因生齒日繁披甲名糧例有定額

勢不能概令食糧當差而各弁兵子弟亦有讀書向上通曉文義者聽其應試以廣進取之階所以造就人才體恤旗僕者無微不至但思八旗根本騎射爲先清語尤其本業至兼習漢文亦取其文義清通便於繙譯乃近年以來各駐防弁兵子弟往往鶩於虛名浮華相尙遂致輕視弓馬怠荒武備其於應習之清語視爲無足重輕甚至不能曉解朕恭閱嘉慶五年 皇考諭旨各省駐防人等准於該省考試文生原係於伊等格外恩施若專務此而廢棄清語騎射卽停止此例不准考試亦屬應該俟清語騎射演習熟練時方准考試等因欽此仰見我 皇考聖慮周詳 訓誡諄諄之至意因思清語騎射全在該管大臣官員等平日盡心訓飭操演而弁兵子弟亦必令藉此進身方能益加奮勉見在武闕鄉試各省駐防一體與考應試之人弓馬如果熟嫻不患無登進之

路其應文試者必應改試繙譯庶不至專習漢文轉荒本業除本科各省文鄉試仍照例准其應考外嗣後各處駐防俱著改應繙譯考試俾有志上進者咸知非熟習清文不能倖邀拔擢自必爭相磨厲日益精通其各該將軍副都統等尤宜隨時訓練董勸兼施毋得視爲具文因循積習以副朕崇實黜浮之意其考試一切章程及繙譯童試進額鄉會試中額應如何酌定之處著軍機大臣會同該部悉心詳議具奏○乙酉諭慧成身任河道總督河務是其專責乃並不先事豫防致有漫口前已降旨革職暫行留任見在口門塌寬至三百六十餘丈下游州縣較之上次祥符漫口情形更爲寬廣糜帑殃民厥咎甚重著卽革任交敬徵等傳旨卽將慧成枷號河干以示懲儆○以鍾祥爲河東河道總督

前任庫倫辦事大臣

○丁亥命廖鴻荃往東河會同鍾祥督辦中牟大工○調柏後

爲戶部右侍郎轉文慶爲吏部左侍郎調成剛爲吏部右侍郎轉

惠豐爲刑部左侍郎調廣福爲刑部右侍郎以博迪蘇爲禮部右

侍郎

由左副都御史遷

○己丑諭麟慶著發往河東交廖鴻荃鍾祥差遣

委用○甲午命改河南武鄉試於次年三月舉行○召張體中來

京調吳其濬爲雲南巡撫以管通羣爲浙江巡撫調存興爲浙江

布政使以黃恩彤爲廣東布政使孔繼尹爲廣東按察使

由糧道遷

○

丁酉諭敬徵等奏豫省情形既准暫開捐輸難以並開豫工二卯

事例一摺覓在籌款興工之際自應分別緩急各官生等就近於

河南捐輸可期踴躍著仍照戶部原議於東河暫開捐輸並准各

省官紳士庶前往具呈輪忱自效以濟工用所有該尙書等前請

移開豫工二卯事例之處著毋庸議

八月癸卯諭布彥泰等奏廢員文冲呈請贖罪一摺文冲前在河

督任內疏防漫口糜帑殃民厥咎甚重所有該廢員呈請贖罪之處著不准行惟朕以孝治天下念伊母年逾八旬不忍其暮年失養用是破格施恩文冲著准回旗養親以示法外之仁○丁未裁稽查崇文門稅務滿漢御史○庚戌諭山東曲阜縣先師林廟係萬方觀禮之鄉遇有祀典必應致誠盡敬以示尊崇一切禮儀祭品尤宜整齊蠲潔用肅觀瞻見在雖無不備之處但恐日久懈生稍失誠敬著山東巡撫嚴飭地方官隨時敬謹察看每屆祭祀之期務須恪恭將事毋得視為具文用副朕崇儒重道至意○壬子撥陝西西安鎮標經制外委一額外外委二歸西安城守營轄○庚申定各省駐防考試繙譯章程○壬戌諭已革兩江總督牛鑑此次著無庸歸入朝審辦理○諭奕山著卽釋放回家閉門思過○乙丑諭太監張成友因伊同鄉黃七鬼被中城指揮訪拏押

解前往探視因官人攔阻不依肆言喧鬧該犯以太監膽敢向指揮衙門挺身滋事迫經官人攔阻猶復肆意喧鬧實屬不法張成友著發往黑龍江給兵丁爲奴遇赦不赦○是月賑陝西沔縣等三縣水災雹災

九月乙亥展緩福建廈門復業農民逋賦○癸未諭宗室奕寶於獲罪遣戍後不知悔過自新輒娶民女爲妻雖因被控悔悟退婚究屬違例奕寶著照議改發往黑龍江圈禁三年以示懲儆期滿釋放後交該將軍嚴加管束○乙酉諭軍機大臣等耆英等奏粵海關裁費歸公實在情形分別籌辦一摺覽奏均悉前因通商案內議裁浮費粵海關辦公無資請將辦貢備貢邊價三項於額外贏餘銀兩內開銷當由該部議令該監督自行籌辦茲據奏請辦貢備貢二款仍照原議於額外贏餘銀兩內開銷任土作貢歲有

常經若取資於官項覈與獻忱之義殊未允協見既無款籌辦著自本年年貢爲始每年三次貢物暫行停止俟一二年後再行察看情形奏明辦理如有應需何項物件聽候隨時傳辦作正開銷至蘆斤變價據實奏請照舊招商變售惟銷不足數仍請動支額外贏餘補足之處是以公項抵作變售亦於事理不合並著該大臣等再行妥議具奏尋祁墳覆奏本年蘆斤設法籌銷湊足趕解明年招商承領繳價儘數報解請免照例價飭銷下內務府議尋議蘆斤加價曾於道光十六年覈減今該督復請減價飭銷似難准行請將發粵海關變價蘆斤自本年起暫行停止仍令該監督隨時體察情形二三年後若稍有起色再行奏明發交變價從之○壬辰前署漕運總督周天爵因病乞休命以二品頂帶休致○癸巳諭前因東河中河九堡漫口當將該河督懸成革職並加枷

號以示懲儆惟念該河督到任甫及數月與文冲之經歷三汛者
究有不同懲成著疏枷加恩留於河工效力贖罪卽交麟魁等差
遣委用○諭軍機大臣等據耆英等奏議定米利堅等國通商章
程等語覽奏均悉所有米利堅等國自應准其一體通商以示撫
綏之意著照所議籌辦總須籌及遠大不可僅顧目前致貽口實
至米利堅有進京瞻觀之請英吉利又於善後條內添註沾恩語
句著耆英等諭以天朝撫馭各國一視同仁凡定制所應有者從
不刪減定制所本無者不能增添若各國紛紛請觀觀光上國不
但無此政體且與舊制有乖至見在已准一體通商天恩高厚爾
等果能約束商人公平交易照例輸稅無稍偷漏大皇帝聞之必
然嘉悅也耆英接奉此旨卽飭黃恩彤等照此明白曉諭不准稍
有含混別生枝節○命尙書麟魁往東河會同廖鴻荃鍾祥鄂順

安督辦大工○甲午命李湘棻以三品頂帶實授漕運總督○是月賑山東福山縣水災蠲緩直隸景州等二十七州縣山東福山縣水災蠲災正雜額賦展緩陝西葭州等三州縣蠲災下忙額賦冬十月辛丑定喀喇沙爾裁屯安戶事宜仍設千總把總經制外委各一○戊申賞奕經二等侍衛爲葉爾羌參贊大臣奕山二等侍衛爲和闐辦事大臣○己酉諭軍機大臣等耆英奏通商事竣朕思鴉片煙雖來自外夷總由內地民人逞欲玩法甘心自戕以致流毒日深如果令行禁止不任陽奉陰違吸食之風旣絕興販者卽無利可圖該大臣見已起程著於回任後統飭所屬申明禁令此後內地官民如再有開設煙館及販賣煙土並仍前吸食者務當按律懲辦毋稍姑息特不可任聽關吏人等遇事誅求致滋擾累總之有犯必懲積習自可漸除而興販之徒亦可不禁而自

止矣所奏定海地方緊要請將舒恭受戴罪當差一節舒恭受罪干斬候此次免勾已屬法外之仁所奏難行該處善後需人著卽咨商劉韻珂管通羣遴選賢員妥爲辦理耆英見已回任所有粵省未盡事宜著卽移交祁墳督同文豐相機妥辦兩江總督任重事繁見在善後未結各件及上海通商事宜均須該督妥辦所請陛見著俟一二年後再行奏請其欽差大臣關防俟回任後遇便齎繳○命耆英回兩江總督任○庚戌賞琦善二等侍衛爲駐藏大臣○癸丑諭江蘇等省安插災民毋令流徙○己未以陳功爲江蘇按察使

由山東兗沂曹濟道遷

○辛酉諭軍機大臣等前據耆英等奏

改設巡檢移駐附近香港之九龍地方稽察出入牌照等語朕以香港爲售貨總匯若僅責成巡檢稽查恐立法尙未周密令該大臣等再行妥議茲據耆英奏稱體察情形不在驗照官之大小全

在行之以實所有前赴香港之船既由給照口岸按月報明粵海關業已互有稽考九龍巡檢不過查其已到未到並無稅銀可收似可無虞偷漏等語著照所議辦理所有祁墳等前奏廣東新安縣屬之官富司巡檢請移駐九龍地方改爲九龍巡檢作爲海疆要缺卽照所請准以試用從九品許文深試署俟試署期滿如果稱職另請實授並定爲在任三年如經理得宜卽予保舉升擢毋庸扣至六年俸滿其見准試署之許文深能否經理得宜仍著祁墳等隨時察看如不勝任卽行撤回另爲酌調毋得稍事因循至該巡檢雖無徵收稅課之責而稽查出入務令相安斷不可任吏胥勒索別生事端是爲至要○甲子予已革臺灣鎮總兵達洪阿三等侍衛爲哈密辦事大臣○戊辰 御製跋成哲親王養正四箴示 諸皇子曰養正書屋之義備載集序茲不復贅彼時朕伯

成哲親王親製養正四箴書以勛予蓋聞發 聖旨精微 慈恩
高厚也予永矢弗諼規模懷感須臾曷敢忽諸溯自嘉慶丙辰迄
今四十有八年矣雖不敢期諸寡過然尙克兢兢自守者非我
皇考之慈訓我伯父之儆省其可得耶每一思之感慟交縈茲皇
子等齒漸成童蒙養之功第一要務我諸兒若能體朕之心守朕
之訓義制事禮制心存存三畏之言懷懷四箴之誠庶幾免乎敗
度敗禮知誘物役也命上書房師傅等各於本阿哥讀書處手錄
一幅懸挂壁閒俾觸目儆心相觀而善同歸百度惟貞之道方符
厚望焉○是月賑安徽太和等三縣山西岢嵐州水災電災貸安
徽太和等四縣齊齊哈爾等四處歉收口糧蠲緩奉天遼陽等六
州廳縣濟陽等三處齊齊哈爾等四處山東臨清等二十七州縣
衛安徽泗州等三十七州縣衛山西岢嵐等七州縣湖南澧州等

六州縣衛被災新舊正雜額賦展緩河南榮澤等二十七縣湖北
沔陽等二十四州縣衛水旱災新舊額賦兩淮富安等十三場新
舊電課

十一月己巳朔日有食之○乙亥諭御史江鴻升奏請飭水師提
鎮出洋巡緝一摺據奏近日廣東洋面不靖閩浙各洋時有匪徒
出沒沿海奸民恃海洋爲後路必宜認真巡緝遏絕奸萌等語近
年沿海水師不能得力兵丁將備但利水師之速於升轉而於海
防一切機宜平時既不講求臨事率多避就總由各該提鎮養尊
處優不以身作則將領以下相率效尤每屆出洋巡緝之時託故
不行轉相推諉甚或畏避風潮逗留近島諱匿盜案捏報虛詞言
之憤恨昨因廣東水師提督吳建勳於廉州洋面盜匪遷延觀望
特旨降爲副將各該提鎮自當知所儆懼嗣後沿海水師各提鎮

著於每歲出洋時具奏一次俟出洋往返事畢洋面如何情形據實具奏其實在因公不能出洋卽著自行奏明均令咨稟該省總督以憑查覈並責成各該總督破除情面密訪明查儻敢偷安畏避及奏報不實隨時分別參辦各該總督皆係朕特簡大員受恩深重如稍存瞻顧之私扶同徇隱經朕別有訪聞除將該提鎮嚴行懲處外必將各該總督一併嚴懲不貸○丁丑諭軍機大臣等孫善寶奏辦理上海開市情形一摺內地販運湖絲前赴上海應查明赴粵路程少過一關卽補納一關稅數該領事求免補納業經該道等告以定章不能更改該領事無辭而退著耆英孫善寶諄飭該道等謹守見定章程妥爲辦理毋任妄意干求致有增減至開市伊始商販之多寡本不能官爲招徠止可聽民自便其走私漏稅諸弊尤須實力稽查著卽責成宮幕久成齡和衷商榷認

真經理毋稍疏懈致滋流弊○庚辰以花沙納爲左副都御史

由通

政使

○辛巳以王植爲浙江巡撫

由刑部右侍郎遷

○壬午調程楸采爲

浙江巡撫王植爲安徽巡撫○丁亥調郭熊飛爲江蘇按察使陳

功爲湖北按察使○丁酉 上詣 大高殿祈雪○是月賑江蘇

沭陽縣大河衛災民貸江西南昌等十五縣陝西綏德等九州縣

籽種口糧倉穀蠲緩直隸新河等四縣江蘇高郵等六十八州廳

縣衛水旱災新舊額賦緩徵陝西綏德等九州縣甘肅狄道等二

十六州廳縣水旱災新舊正雜額賦展緩江西南昌等十五縣通

賦

十二月壬寅以陳繼昌爲甘肅布政使

病痊布政使

○癸卯准廣西永

甯州開採崇慶鐵廠○甲辰程楸采卒調梁寶常爲浙江巡撫以

崇恩爲山東巡撫調陳繼昌爲江甯布政使賞鄧廷楨三品頂帶

爲甘肅布政使○乙巳諭軍機大臣等據程琳采奏安徽徽州等府州所屬地方向有棚民見在委員清查等語徽州甯國池州滁州廣德等州所屬山多閒曠向有浙江溫台等處民人搭棚棲止該棚民等生齒日繁兼有無業之民逗留涸迹自應徹底清查著王植飭令委員等前往該地方認真稽查編設棚頭發給門牌除歷年已久確有冊籍可憑者免其驅逐外其新添之戶一概逐令回籍毋得養癰貽患日久別滋事端其毗連浙江江蘇兩省交界地方並著知照各該撫一體挨查認真辦理毋得視爲具文○丙午雪○丁未定伊犁三顆樹等處回屯民戶章程○己酉調祝慶蕃爲吏部右侍郎以侯桐爲兵部右侍郎由內閣學士遷轉魏元烜爲刑部左侍郎以張澧中署刑部右侍郎前雲南巡撫○壬子以讀本錯誤革內閣學士巴雅爾綽克托職○丁巳龔守正以病免以陳官俊

爲禮部尙書

由吏部左侍郎遷

○戊午轉祝慶蕃爲吏部左侍郎調季芝

昌爲吏部右侍郎以周祖培爲禮部右侍郎

由內閣學士遷

○己未以趙

光王廣蔭俱爲內閣學士兼禮部侍郎銜

趙光由左副都御史王廣蔭由詹事遷

○

壬戌諭各直省中式舉人自下科始一體覆試

○甲子諭前因查

庫御史銀庫司員罰賠庫項限內陸續全完降旨交軍機處存記

年終彙奏茲開單呈覽所有歷任查庫御史已革左副都御史續

齡著以七品筆帖式用已革光祿寺卿張秉德著仍革職已革奉

天府府丞駱秉章著以庶子用已革告病內閣侍讀學士張鑒著

以七品筆帖式用已革戶科掌印給事中景斌著以七品筆帖式

用已革兵科給事中舒光仍著革職已革工科給事中蘇芳阿著

以主事用已革工科給事中薩霖著以七品筆帖式用已革浙江

道御史宋林曙著以七品小京官用已革內閣侍讀周春祺著以

主事用已革甘肅布政使程德潤著以主事用已革四川布政使
龔綬著以員外郎用已革兩淮鹽運使但明倫著以員外郎用已
革河南糧鹽道況澄仍著革職已革甘肅甘涼道郭柏蔭著以主
事用已革福建督糧道劉夢蘭著以七品小京官用已革湖北安
襄鄖荆道吳式敏著以七品小京官用已革告病福建興泉永道
周日炳著以七品小京官用已革陝西鳳翔府知府豫泰著以七
品小京官用已革廣東肇慶府知府趙長齡著以主事用已革休
致廣西平樂府知府俞恆澤仍著休致已革降調給事中瞿溶著
以七品小京官用已革福建布政使曾望顏著以主事用已革陝
西榆林府知府李錫齡著以知府用歷任銀庫司員已革告休都
統蘇成額著賞還頂帶已革內閣侍讀學士保極著以七品筆帖
式用已革兵部員外郎額爾德穆著以七品筆帖式用已革銀庫

員外郎文彩著以員外郎用已革江西按察使文俊著以道員用
已革山西大同府知府嶸祿仍著革職已革陝西西安府知府貴
麟著以七品筆帖式用已革兵部侍郎功普已革江蘇常鎮通道
周頊已革給事中李遠烈均仍著歸另案革職○是月蠲緩河南
睢州等十六州縣被水新舊正雜額賦緩徵伊犁被旱回戶額賦
貸款○是歲朝鮮緬甸暹羅入貢○會計天下民數數直隸等省
通共大小男婦四萬一千七百二十三萬九千九十七名口存倉
米穀三千二百一萬八千二十一石四斗六升七合八勺

東華續錄

道光四十九

臣王先謙敬編

臣周澍蕃恭校

道光二十四年甲辰春正月戊辰朔以來歲 皇太后七旬萬壽

詔開恩科於本年舉行鄉試來年舉行會試○辛未 皇八子奕

詒生○丁亥諭朕聞近來江南河工時有過往官員及舉貢生監

幕友人等前往求助該河督及道府等官礙於情面不能不量爲

資助以致往者日眾竟有應接不暇之勢不知河工銀兩絲毫皆

關國帑河員承領錢糧均有購料修防之責儻過往官員舉貢生

員幕友等視爲利途紛紛前往該員等焉有自出己貲之理無非

濫請支領剋減工程以爲應酬之費於河務甚有關係不可不嚴

行禁止因思此等遊客不能無因至前往往向在京官員求索書

信以爲先容甚至屬託該河督授意屬員廣爲吹噓此風可惡之至著潘錫恩通飭各屬一律嚴禁嗣後查有持信往謁意在干求者著該河督即將其人暫行扣留指名參奏其有向道廳求助業經幫助銀兩者卽一併參辦槩不得意存見好稍事姑容並著兩江總督明查暗訪儻此後仍有前項情弊該河督未卽舉發卽行單銜奏參庶幾懲一儆百力挽頽風南河既有此弊東河亦所不免著東河總督通行嚴禁並責成山東河南巡撫一體訪查至各省鹽務衙門向來陋習相沿亦應嚴行杜絕著通飭各省鹽政一槩禁止毋任虛糜課餉其兼管之各省督撫均著密行稽查以期弊絕風清經此次通飭禁止以後兩河道廳及鹽務官員儻再藉口應酬以致侵欺帑項必當嚴加懲治不貸○諭據祁墳奏越南國王遣使張好合等將內地拏獲盜犯金二紀等八名並槍礮等

項駕駛兵船解省審辦已有旨將該行价等壓艙貨物免其納稅矣因念該國王拏獲內地搶掠匪徒遣使解審深明大義甚屬可嘉著俟該國下屆應貢年分使臣到京於正貢照例賞賜外另行加賞以示褒獎著周之琦先行檄諭並著存記於奏報越南貢使入境時附片提奏○邵甲名以病免以張祥河爲廣西布政使王簡爲河南按察使

出湖南辰沅永靖道遷

○壬辰諭向遇恭謁

東陵之年

直隸總督呈進大小豬羊著自本年爲始無庸呈進改進食物及乾鮮果品以備賞賚之需○丁酉諭前據麟魁等奏墾工遭風屢墊情形已有旨令該尙書等相機妥辦萬勿坐失機宜計此時當已接奉因思口門僅賸十四丈九尺合龍較易惟埕前水深八九丈餘進占尤須慎重本年節候較早轉瞬桃汛經臨辦理恐更棘手連日未據奏報朕心焦念之至著傳諭麟魁廖鴻荃鍾祥鄂順

安將見在水勢平險若何進占能否順利約計合龍當在何日據
實具奏仍不得因有此旨稍存將就之見草率蒞事致貽後患再
前奏內稱挑水壩業已挑動大溜一俟水面擡高風勢順利再行
相機啓放等語引河必須一律深通啓放時方能暢行無滯此時
所挑引河情形若何並著一併具奏以慰廑懷○是月給直隸東
光縣江蘇海州等三州縣浙江富陽等三縣水旱災口糧貸陝西
葭州等四州縣山西大同等三縣水災雹災籽種緩徵直隸景州
東光二州縣山東臨清等十六州縣衛浙江海南等十七州縣暨
橫浦等四場水旱災額賦鹽課展緩直隸薊州等十五州縣通賦
二月戊戌朔祁墳以病免調書英爲兩廣總督以璧昌署兩江總
督由福州將軍署○己亥 上御經筵○庚子以祈禱靈應封廣東新甯
縣宋校尉陳仲真爲綬靖伯○辛丑諭六公主著封爲壽恩固倫

公主又諭原任御前大臣一等公博啓圖之子景壽著指爲壽恩
固倫公主之額駙所有應行事宜著各該衙門照例豫備景壽著
施恩先賞頭品頂帶在上書房讀書○諭軍機大臣等有人奏中
牟大工辦理不善未能及時報竣請專責成以杜後患一摺前因
壩工遭風屢墊降旨令麟魁等相機妥辦昨又由四百里馳諭令
將見在情形據實具奏計此時當已接奉矣辦理大工全在委用
得人據奏管理料廠管辦引河各員均不能覈實認真少發工錢
以致人夫逃散剋扣麻價以致料販不前且近日連走五埽工程
較難等語著麟魁廖鴻荃鍾祥鄂順安將摺內所指各情節逐一
確查據實覆奏毋稍容隱○壬寅以祈禱靈應封廣東故龍門協
副將景懋爲忠顯伯○癸卯以傳繩勛爲雲南布政使汪雲任爲
陝西按察使○丙午諭戶部奏請將甘肅新疆等處未墾地畝飭

查試墾等語西陲地面遼闊隙地必多果能將開墾事宜實心籌辦當可以歲入之數供兵食之需實爲經久有益前據伊犁將軍布彥泰奏報於塔什圖畢等處開墾地畝疊著成效洵屬忠誠爲國之舉均經分別施恩而烏嚕木齊於道光二十年開墾地止二萬餘畝其未墾之地未據該都統奏明續辦著布彥泰會同惟勤體察情形派員確勘如有可墾之地務須設法招徠隨時奏明辦理其伊犁已開地畝業經照例升科此外及各城地方如有曠地可以招墾者仍著該將軍等詳細飭查一律奏辦至甘省報明水衝沙壓案內尙有七千五百餘頃未經墾復著富呢揚阿遴委委員確加履勘遇有堪以墾復之處即將應復地畝隨時咨報不得任聽該委員等畏難捏稟阻隔不行務使野無曠土人盡力田俾民食邊儲並收實效○己酉以伊犁開墾督辦有方加布彥泰

太子太保○庚戌諭前派麟魁廖鴻荃督辦中牟大工連日據奏將次合龍方深殷盼乃本日復據奏稱於初七初九等日東壩連次蟄失五占自請從重治罪並請簡派熟諳河務之大臣來工督辦等語覽奏憤懣之至從前若能趕緊辦理於正月內合龍則春水未旺焉有此失總係麟魁等辦事顛預遷延所致罪無可寬惟遽予罷斥另派大臣接辦伊等轉得置身事外諉過他人麟魁廖鴻荃均著革職給予七品頂帶仍留河工督率儻能竭力挽回尙可量從寬典鍾祥任事未久著革職給予七品頂帶暫留河督之任鄂順安係兼管河工著革職留任降爲三品頂帶所有全工事宜仍著責成麟魁廖鴻荃鍾祥鄂順安督飭在工文武員弁趕緊設法相機妥辦設若仍前玩泄必皆重治其罪所有應行陳奏事件仍著照舊列銜會奏此次失事之文武管壩各員弁著麟魁等

查明嚴參具奏○以特登額爲禮部尙書文慶爲左都御史

山吏部左

侍郎

○調陳官俊爲工部尙書以李宗昉爲禮部尙書杜受田爲

左都御史

由戶部左侍郎遷

○辛亥調柏葰爲吏部左侍郎成剛爲戶部

右侍郎惠豐爲吏部右侍郎轉廣福爲刑部左侍郎調斌良爲刑

部右侍郎以花沙納爲盛京刑部侍郎

由左副都御史遷

○壬子調祝慶

蕃爲戶部左侍郎轉季芝昌爲吏部左侍郎調侯桐爲吏部右侍

郎以孫瑞珍爲兵部右侍郎

由內閣學士遷

○癸丑諭軍機大臣等本日

已明降諭旨將牛鑑釋放發往河南交鄂順安差委矣該革員前

在河南巡撫任內頗得民心該省民情淳樸上年興築省城捐輸

踊躍並未動支帑項甚屬好義急公此次中牟大工將次合龍忽

遭風暴連蟄五占需用浩繁應如何設法籌辦之處牛鑑素爲該

省士民所悅服經朕特加恩宥自當倍加黽勉實力妥籌以紓國

計而蘇民困著俟牛鑑到省後卽將此旨發給閱看將此諭令鄂順安知之○丁巳諭軍機大臣等孟保等奏續接廓爾喀國王來稟及諭覆緣由一招覽奏均悉廓爾喀國王稟詞內稱噶箕因上年來藏懇求一切未准不敢回國並牽敘聶拉木濟隴地方十年歸西藏管理三年歸該國管理等語實屬謬妄該大臣等正詞曉諭辦理尙爲妥協儼該國再差頭目來藏另有懇求該大臣等仍當據理回覆杜其妄念是爲至要琦善到任後卽著會同鍾方安辦但言語不通文字不同止憑一譯尤當加倍留心勿致歧誤○以景亮爲內閣學士兼禮部侍郎銜由光祿寺卿遷陳孚恩爲左副都御史由大理寺卿遷○戊午李象鵬以病免以羅繞典爲貴州布政使恆春爲山西按察使由直隸永定河道遷○己未諭前因麟魁等奏大工蟄失堵占自請治罪當經降旨將麟魁等分別懲處仍責令趕緊挽回以

圖後效本日復據奏稱所需料物近處無可籌買分投購運愈遠愈遲斷非一二月內所能備齊水勢日增補築萬難措手且時方耕作人夫多已歸農一時難於招集請援照儀封等工成案展緩辦理所稱種種棘手自係實在情形若仍令勉強趨辦終歸無濟著准其將見在壩工暫行緩辦麟魁廖鴻荃係特派督辦之員遷延不力咎無可辭前已有旨革職著將所給七品頂帶一併革去卽行來京聽候諭旨鍾祥見留河督之任鄂順安係兼管河務所有全工事宜著卽會同悉心籌畫將來興舉大工卽著鍾祥鄂順安督辦以專責成此時惟有嚴飭工員將兩壩埽占設法保護遇大汛經臨尤須竭力防守庶將來補築尙易爲功至被災處所居民失業朕心惻惻實深著該撫加意撫綏務令安輯見在工次人夫半歸耕種其無業貧民均著妥籌設法安插毋令一夫失所鍾

祥鄂順安於河工修防地方撫輯事宜均屬責無旁貸務須實心經理和衷共濟不得游移推諉以重前愆麟慶慧成牛鑑均著留工卽交鍾祥鄂順安酌量差遣委用○諭軍機大臣等本日據程喬采奏米利堅國使臣因未接到上次阻止札文於正月初八日駛至九洲灣泊欲來天津朝覲經該護督開導傳知使臣尙未回覆佛蘭西亦有巡船拋泊等語西洋各國向來不通朝貢卽北駛至津亦必諭令回粵所欲商議章程亦必仍交耆英等酌辦斷無另遣大臣與議之理耆英接奉此旨馳驛前往廣東會同程喬采妥爲辦理○丁卯諭朕每屆謁陵於蹕路經過州縣均經隨時加恩本年恭謁東陵業已先期降旨見在雖不親行而沿途地方業經備辦所有蹕路應行經過之大興通州三河薊州遵化五州縣地方應徵本年錢糧仍著加恩蠲免十分之三○是月給

江蘇海州等三州縣衛民屯口糧並緩徵江蘇高郵等三十二州縣衛災民逋賦

三月戊辰諭軍機大臣等麟魁等奏體察新工情形一摺據奏黃河挾淤夾沙勢甚雄猛豫省又俗名坡河伏秋盛漲非二百丈口門不能容納見在口門僅寬三十餘丈恐致下壅上潰且引河頭之攔黃壩亦慮刷塌受淤等語著鍾祥鄂順安即將挑水壩擇要加培保護西壩埽占其東壩出水埽面准其暫行拆除展寬口門仍擇可用料物作爲加鑲之用其攔黃壩卽著竭力保守毋使川河淤墊以致挑挖過費該河督等務須隨時相機設法補救俾將來興辦堵合費省工速以贖前愆○壬申諭耆英見已調任兩廣總督各省通商善後事宜均交該督辦理著仍頒給欽差大臣關防遇有辦理各省海口通商文移事件均著准其鈐用○丙子

博迪蘇以病免以倭什訥署盛京工部侍郎

由盛京兵部兼署

○丙戌河

東河道總督鍾祥奏會籌全工事宜得旨一夫失所辜在朕躬爾等善爲之○戊子諭軍機大臣等據劉韻珂等奏臺灣匪徒聚眾謀逆經該鎮道等督兵勦捕拏獲首逆各犯大概情形一摺臺灣嘉義縣巨匪洪協等糾眾豎旗謀逆並有已革武生郭崇高合夥起事所糾匪黨約共二千餘人經該鎮道等督同各員弁帶兵勦捕接戰六次殺斃賊匪一千餘名將首逆洪協及股首林孕等先後拏獲又嘉義縣匪徒李安等糾匪滋事經營縣往拏擒獲多名辦理尙屬妥速所有已獲各犯著飭該鎮道訊取確供卽在臺灣地方分別正法以昭炯戒其在逃之股首郭崇高劉取葉周余朝仍著上緊嚴拏務獲懲辦毋任一名漏網至此案郭崇高之謀逆雖據稟因誑收民錢代爲完糧賤買壞穀上倉經該縣查拏所致

而洪協等又因何事遽起逆謀且何以能糾眾二千餘人之多著
該督轉飭該鎮道向已獲各犯嚴訊實情徹底究辦其此次隨同
勦捕之員弁兵丁何人尤爲出力何人擒獲要犯及嘉義縣匪徒
李安是否就獲均著飭令確查具奏再降諭旨○癸巳以故貝勒
蘇馨子奕格降襲貝子○馮芝以病免轉周祖培爲禮部左侍郎
以吳鍾駿爲禮部右侍郎由內閣學士遷○乙未四川提督齊慎卒贈太
子太保○丙申李湘棻丁憂以惠吉爲漕運總督病痊都統○是月貸
山西平定等十一州廳縣歉收倉穀展緩浙江定海廳歉收新舊
額賦山西保德等十一州廳縣通穀

夏四月丁酉朔諭軍機大臣等前因回疆所用當五當十錢文行
使便利降旨今富呢揚阿等體察陝西甘肅情形依照鑄行茲據
該督奏稱普爾錢一項惟南路八城通行北至吐魯番東至哈密

卽不能行其吐魯番所產棉花亦不能以普爾錢收買民間不能
施行在官卽難搭放等語回疆普爾錢文藉可疏通圖法惟欲自
外而內必須漸推漸近著布彥泰達洪阿體察南北兩路各城情
形能否一律行使確加訪覈據實具奏尋奏普爾錢係淨紅銅鑄
造做鑄反增工費其帶至東北各城每箇止作一文之用不能當
五當十批候旨行○庚子論上年十二月內派侍郎柏葰爲正使
副都統恆興爲副使前往朝鮮諭祭茲據該侍郎等差竣回京奏
稱該國於照例餽送之外另送贐銀五千兩陳明請旨等語朝鮮
世守東藩虔修職貢遇有大臣官員差往彼國舊有餽送儀物之
例蒙 皇祖高宗純皇帝諭按舊例裁減一半永著爲令原以儀
物繁多不忍重勞該國若概不收受又恐其以缺乏禮數有歉於
心是以酌中定制厚往薄來 成憲昭垂允宜遵守此次該國餽

送柏葭恆興宴金土儀均照舊例減半自應遵例收受其另送贐銀五千兩據稱前此天使原無贐儀此次該國王因感恩榮幸格外將敬經該侍郎等堅辭謝卻該陪臣攜銀隨行沿途求受將屆出境又復跪地叩懇免冠垂涕稟稱如不收受國王必治伊等重罪並該國王亦欲請罪且伊等雖隨從入京總期收受方敢回國等語朕惟恭敬之實不在多儀此次諭祭朝鮮該國減半餽送之物業據該侍郎等照例收受已足表該國事大之誠若另送餽贐多金致增糜費既與定例有違卽非朕德禮綏藩之意此項贐銀著禮部暫行存貯遇有該國便員來京令其帶回繳還並將此旨傳諭該國王嗣後天朝差往官員俱著恪遵成例減半餽送萬不可於額外加增虛耗物力其派出之大臣官員亦著禮部將此旨恭錄一道並將例載減半禮物數目開具清單一併交正副使齎

帶前往永遠遵行以符定制而示柔懷○癸卯以培成爲盛京工

部侍郎

由內閣學士遷

○雲南南甸首逆土目刀承緒伏法○乙巳諭軍

機大臣等自古足國之道首在足民未有民足而國不足者天地自然之利原以供萬民之用惟經理得宜方可推行無弊卽如開礦一事前朝履行而官吏因緣爲奸久之而國與民俱受其累我朝雲南貴州四川廣西等處向有銀廠每歲抽收課銀歷年以來照常輸納並無絲毫擾累於民可見官爲經理不如任民自爲開採是亦藏富於民之一道因思雲南等省除見在開採外尙多可採之處著寶興桂良吳其濬賀長齡周之琦體察地方情形相度山場民間情願開採者准照見開各廠一律辦理斷不可假手吏胥致有侵蝕滋擾阻撓諸弊該督撫等必能仰體朕意妥爲籌辦固不可畏難苟安亦不得抑勒從事總期於民生國計兩有裨益

方爲妥善各省情形不同不准彼此觀望○庚戌以羅文俊爲內

閣學士兼禮部侍郎銜

由詹事遷

○癸丑命王錫朋子舉人承瀚以六

部小京官用○己未諭軍機大臣等程喬采奏米利堅兵船退出

外洋並英吉利使臣樸鼎查退職回國另換公使德庇時接辦等

語覽奏均悉著英此時當已行抵粵東其英使樸鼎查見已退職

回國卽著耆英等與新到之德庇時申明條例令其遵照辦理至

樸鼎查因何事退職德庇時能否相安並著耆英等隨時具奏尋

奏樸鼎查因患病回國德庇時曾於公司館未散時來粵充當大

班粗通漢語數月以來尙屬相安報聞○辛酉賜孫毓淮等二百

九人進士及第出身有差○乙丑諭原任大學士富俊文孚宜力

多年居官清正且其見在子孫均係承嗣所有代賠未交庫款著

加恩寬免○諭寶興奏馬邊夷匪出擾經官兵擊退請將疏防之

備弁斥革一摺此次夷匪分股出擾人數甚眾經官兵分股驅擊殲戮使其大受懲創逃遁回巢不至蔓延辦理尙爲迅速惟該夷匪入境之處係馬邊右營及煙峰汛所管該備弁等事先疏於防範雖隨同擊斃多匪地方見在靜謐究有應得之咎四川署馬邊右營守備左營千總張明祥煙峰汛千總張大麟著卽斥革以示懲儆○是月加給河南睢州等十五州縣水災三月口糧

五月辛巳開採廣西北流縣鐵礦○丙戌准河南築攔黃堰及蓋壩各隄防護省城○壬辰以景慶爲內閣學士兼禮部侍郎銜

散秩大臣遷

由委

六月丁酉直隸永定河溢○壬寅諭軍機大臣等陸費瑤奏耒陽縣病棍聚眾抗糧滋事親往查辦一摺據稱耒陽縣西鄉殺陽二姓抗不完糧並設局斂費阻截糧戶經該縣獲犯訊究膽敢糾眾

撲城並拒傷弁兵胡俊等見尙退匿城外未散等語匪徒抗糧滋事糾合至千餘人之多並敢持械攻城拒傷官兵實屬罪大惡極必應迅速剿辦淨絕根株見據該撫挑選兵三百名親帶前往並咨永州鎮派兵三百名馳往會剿卽著該撫會同該鎮安速掩捕剋期竣事勿使蔓延其爲首之陽大鵬等及著名匪犯務須按名捕獲盡法嚴懲毋任一名漏網至該縣連界各地方要隘均著加意嚴防以免竄逸石生玉見在諒已抵任著卽實成該提督會同剿辦○癸卯諭本日據軍機大臣會同刑部議奏貴州軍犯擁擠酌減調劑等語新疆遣犯改發內地恐人數眾多不特約束難周且於民風大有關礙非若新疆地方遼闊外遣人犯易於安插所有舊時改發內地各條著仍照舊例發往新疆交該將軍設法妥爲安插並嚴飭所屬認真查覈嚴加管束毋令滋生事端以期積

久無弊○戊申諭前據戶部奏各省未經報部各荒地恐有私墾隱賦各情當經降旨令該督撫等嚴實查明具奏並因甘肅水衝沙壓之地未經墾復者七千五百餘頃之多復令富呢揚阿委員確勘將應復地畝隨時咨報辦理茲據該督奏請專辦招墾立限升科等語荒地既多其閒私種者或漏未升科拋荒者或憚於墾復若非特派大員親加周歷廣爲勸諭則委員捏飾州縣遷延種種弊端終無實效所有該省招墾事宜著卽責成鄧廷楨專心妥辦其藩司篆務著楊以增暫行署理甘肅臬司著富呢揚阿派員接署鄧廷楨曾經歷任封疆此次又棄瑕錄用簡任藩司必能激發天良仰體朕意實力講求著於接奉諭旨後親赴各屬逐一勘明將堪以墾復之處設法招徠一律報墾其有未經報明私行墾種者均卽勒限照例升科儻各州縣畏難苟安藉詞阻撓並著指

名參奏務使查辦之後野無曠土人盡歸農以實邊儲而足民食
毋得仍照向年舊案苟且塞責○戊午諭軍機大臣等前因雲南
等省向有銀廠抽收課銀降旨令該督撫體察情形如此外有可
開採之處准照見開各廠一律辦理茲據周之琦奏稱廣西銀廠
見在僅存三處每年共抽正課銀四百兩不等爲數寥寥其臨
桂等縣舊有各廠久經封閉並未續開惟礦砂有衰旺之時地氣
有轉旋之候見已密飭府縣添派委員詳細躡勘如有礦砂復露
之處卽照見辦章程招民開採等語天地生財以供民用若不能
變通盡利則民用易匱而財貨亦有棄地之虞廣西舊有各廠前
因採取過多山空砂薄是以暫行封閉積之既久地氣亦鬱而必
宣但能因地之利順民之情自可著有成效見在查勘各該處如
果有礦苗重出砂路復新卽著諄飭該委員等會同地方官勸諭

商民試行採辦務在禁其擾累去其煩苛使民樂於從事見存蕉
木南丹挂紅三廠抽課無多亦著察看該處附近之區是否可以
量爲推廣此外各山場如本非舊廠而有可開採之處並酌量情
形一律招辦儻該員等不能妥爲經理或飾辭阻撓或張揚抑勒
或以課銀爲數無幾爲詞甚至假手吏胥侵漁圖利該撫一有聞
見務卽隨時撤回指名參奏仍另派委員實心籌辦以期於國計
民生兩有神益○壬戌諭軍機大臣等傳知前鋒統領護軍統領
等著將該處所貯陰文合符五扇送交軍機處貯大內永不動用
新頒陰文合符四扇著交該統領等敬謹收貯此旨著軍機處該
統領均各存記○諭據陸費瑑奏官兵剿捕未陽匪徒連獲勝仗
情形覽奏均悉該匪等巢穴俱在西鄉魚陂洲啞子山一帶徑路
崎嶇樹木叢雜經永州鎮總兵英俊等分投搜捕殲斃多名焚毀

賊巢餘匪奔竄勢已窮蹙辦理尙屬妥協惟首犯陽大鵬尙未就擒著該撫會同石生玉設法搜捕斷不准令倖逃顯戮日久稽誅其餘各要犯亦須按名偵緝分路兜擒以正典刑而伸國法其見獲之僧倡貫一犯既訊係陽大鵬主謀正可向該犯嚴究陽大鵬下落毋任狡展諱匿○是月緩徵山東臨清等二十二州縣並德州東昌二衛被災新舊額賦有差